

Berkhidmat Di Bawah PM Pertama Dan Kedua Banyak Membantu - Abdul Rahman Yakub
Bernama
11 Ogos, 2013
Oleh Caroline Jackson

KUCHING, 11 Ogos (Bernama) -- Malaysia, terutama Sarawak, telah mencapai kemajuan besar, sejak ditadbir dua perdana menteri pertama negara, kata bekas negarawan Tun Abdul Rahman Yakub.

Abdul Rahman, 85, berkhidmat di bawah kedua-dua pemimpin itu sebagai menteri persekutuan dan ketua menteri ketiga Sarawak.

Beliau yang banyak menerima sanjungan kerana mengendali Operasi Seri Aman 1974 yang menyaksikan 482 penganas komunis (PK) meletakkan senjata, berikutan perjanjian damai, berkata berada dalam kabinet persekutuan memang banyak membantu.

PK dipimpin oleh bekas ketua Parti Kalimantan Utara (PKU) Bong Kee Chok.

"Tunku Abdul Rahman Putra seorang yang begitu mulia, dan kemudian Tun Abdul Razak Hussein menggantikan tempat beliau sebagai perdana menteri kedua.

"Kedua-dua tokoh itu cukup senang dengan Sarawak dan mereka minta saya pulang untuk menangani keganasan komunis," kata Abdul Rahman.

Beliau bercakap kepada pemberita pada rumah terbuka Hari Raya beliau di sini hari ini, yang turut dihadiri Yang di-Pertua Negeri Tun Abang Muhammad Salahuddin Abang Barieng.

Abdul Rahman menjawat menteri pelajaran, sebelum pulang ke Sarawak untuk menjadi ketua menteri dari 1970-1981 dan kemudian dilantik sebagai yang di-pertua negeri dari 1981-1985.

Menceritakan peristiwa yang membawa kepada tercapainya perjanjian damai yang ditandatangani 39 tahun lalu di Sri Aman, ketika itu dikenali sebagai Simanggang, beliau berkata, kerajaan memberi pengampunan kepada (ketua PKU) Kee Chok dan pengikutnya, yang telah bersetuju pulang ke pangkuan masyarakat. "Bong Kee Chok adalah sahabat saya dan bila saya pulang dari Kuala Lumpur, saya hubungi saudara lelakinya, meminta beliau menyampaikan hasrat kerajaan untuk bertemu dan membincangkan perkara itu, serta jaminan bahawa beliau (Kee Chok) tidak akan dipenjarakan," ingat beliau. Abdul Rahman adalah bapa saudara kepada Ketua Menteri Sarawak sekarang Tan Sri Abdul Taib Mahmud, yang menggantikan tempat beliau pada 1981.

Dalam satu temubual dengan Bernama pada 2008, Abdul Rahman pernah berkata bahawa Abdul Taib adalah seorang yang berkelayakan dan beliau belum melihat ada orang lain yang dapat "menyamai Abdul Taib".

Menyifatkan hubungannya dengan anak saudaranya itu sebagai "air dicincang tak akan putus" Abdul Rahman berkata hubungan mereka kini kukuh, setelah beberapa perselesaian antara mereka di masa lampau dapat diselesaikan.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=969312>

